

四庫全書

史部

# 欽定四庫全書

史部

世宗憲皇帝諭行旗務奏議卷九至十三

詳校官左都御史臣李綬

編修臣表謙覆勘

總校官知縣臣楊懋珩

校對官中書臣范來宗

謄錄監生臣鄒曾蔭

欽定四庫全書

世

宗憲皇帝諭行旗務奏議卷九

八旗都統等議覆據副都統趙弘濟奏稱八旗所存  
取租官房內歪斜傾頽者若有願以已力修理租住  
之人著該管官員將修理價值及如何修理之處料  
估計算報知該管大臣令其修理居住將伊所用銀  
兩數目俟抵完房租之時再行取租等語應如趙弘  
濟所請將八旗所存取租官房內有情願以已力修

理居住者詳細料估令其修理居住其修理價值俟抵完房租之時再行取租又據奏稱所餘官房內有歪斜傾頽者若照原定價值必至無人承買若驟行修理又致多費錢糧請交該旗會同工部詳查減價令人承買等語亦應如所請令該旗會同工部詳查減價登記檔案勒限三箇月有情願扣俸承買者令其承買若限內無人承買著動用戶部存貯官房租銀兩派該旗能員修理再行取租

奏入於雍正九年二月十二日奉

旨依議

刑部議覆據四川總督黃廷桂奏稱據按察使劉應鼎審結南川縣民韋巨珍因瘋病殺死鄧仕聖之妻陳氏及子女一家四命一案照律免抵按名各追埋葬銀十二兩四錢二分給付屍親領埋等因詳報到臣臣思瘋病免抵本係原病者之無知而例應禁錮所以防意外之妄行其如病者之親黨骨肉不忍鎖

禁而鄰里俱瞻顧情面觀望不言地方官又因無關  
考成率多膜視以致害及無辜將無底止甚非我

皇上愛育生民之至意伏乞

敕部定議凡瘋病之人有殺人者其本家親族鄰里照例  
懲治外並請將平日不行稽查鎖禁之地方官嚴定  
處分等語應如所請嗣後各省及八旗凡有瘋病妄  
動之人其親屬鄰佑人等即報明該地方官該佐領  
處令伊親屬嚴行鎖錮看守如無親屬即責鄰佑鄉

約地方族長人等嚴行鎖鑰看守倘親屬鄰佑鄉約  
地方族長人等容隱不報不行看守以致瘋病之人  
自殺者照不應重律杖八十至殺他人者照知人謀  
害他人不即阻當首報律杖一百治罪如親屬鄰佑  
人等已經報明而該地方官該佐領不嚴飭親屬鄰  
佑人等嚴行鎖鑰看守以致瘋病之人自殺者將該  
管地方官該佐領照看守疎忽例罰俸三箇月若致  
殺他人者將該管地方官該佐領照防範不嚴例罰

俸一年俟

命下之日通行八旗五城步軍統領順天府大宛二縣直隸各省督撫將軍及奉天府一體遵行倘於文到一月之後有仍行疎縱以致自殺殺人者即照此所定之例分別議處治罪

奏入於雍正九年十二月二十一日奉

旨依議

世宗憲皇帝諭行旗務奏議卷九



欽定四庫全書

世宗憲皇帝諭行旗務奏議卷十

八旗都統等議覆據署理副都統事務叅領祖應祥  
奏稱每逢

天壇

地壇

祈穀壇大祀前一日各官出城外齋戒請將

欽點大臣御史及察旗叅領侍衛內令一半在城外稽查

齋戒官員等語臣等伏思

天壇

地壇

祈穀壇三大祀八旗應齋戒官員俱於祭之前二日各於本旗公衙門齋戒此齋戒時既有本旗大臣監臨又有欽點御史察旗叅領侍衛稽查及祭之前一日齋戒各官俱出城外齋宿一夜以備次日隨祭而

欽點御史等傍晚收齋戒官職名旋即入城齋戒各官既

無官員稽查又無大臣約束不肖官員或致不虔怠  
於

祀事有乖

大典亦未可定應如所奏嗣後八旗齋戒各官於本旗  
公衙門齋戒時除稽查大臣官員侍衛叅領照前例  
管轄稽查外及祭之前一日出城齋宿時於

欽點稽查大臣御史察旗叅領侍衛內著一半留宿城外  
不時稽查如此則齋戒各官人人敬肅而

祀事不致怠忽矣

奏入於雍正十年四月二十五日奉

旨依議

鑲藍旗滿洲都統平郡王福彭等奏稱凡自外省來  
京引

見人員仰蒙

皇上深恩恐其多所費用不令久候京師屢曾降有

諭旨現今自荊州來京襲職之佐領阿拉領催安第若令

其等候至年底具奏家譜之時一同具奏既有誤伊  
任內事務又致多費盤纏臣等仰請將阿拉等襲職  
之事即入於補授外省官員事內一同具奏引

見嗣後凡外省襲職事件隨到隨即具奏庶外省人員無  
久候之勞可以仰副我

皇上體恤臣工之至意矣

奏入於雍正十年四月二十六日奉

旨依議嗣後八旗照此遵行

大學士鄂爾泰張廷玉署理步軍統領事務都統莽  
鵠立尚書鄂爾奇議覆據內務府總管丁皂保奏稱  
有在東安門西安門內路傍支布傘作書場茶社及  
皇城內街道搭棚設醺揚旛掛榜者俱交與步軍統領  
嚴行禁止等語查東安門西安門內大路兩傍街面  
寬平縱有車馬往來不至擁滯目今時值炎暑經商  
小民既不得設立板棚若再不許張支布傘恐暑氣  
中人難以存立應將張支布傘之處不必禁止惟

御河橋以東團殿白塔等處街道既狹且於

紫禁城相近應如丁皂保所請嚴行禁約再城內居人  
凡作道場其有力之家各於院內自設經棚大門外  
復立鼓吹棚去道稍遠例應不禁其房屋臨街院落  
狹小半係無力之家不應作過費之舉只應准其於  
門外貼近暫搭蓆棚以為親朋坐立之所若於道上  
搭棚揚旛掛榜實非所宜應行禁止至於謝神打醮  
各有寺廟當道搭棚尤屬不可亦應如所請一例嚴

禁

奏入於雍正十年閏五月二十二日奉

旨依議

吏部奏稱京城現任滿漢各官例於俸滿應陞轉時  
制筆籤得缺即引

見補授若派往軍前辦事官員遇俸滿應陞雖經指缺因  
未引

見不准實授其新陞之缺既已空懸而現出之缺例不另



補常有兩缺空懸數年者且該員効力軍前乃不獲  
食陞缺之俸與在京官員一體論俸陞轉似為不均  
臣等公同酌議除口內奉差人員仍照例俟回京之  
日帶領引

見外其現任滿漢派往軍前辦事官員有俸滿應陞者一  
經得缺即行具題請

旨補授令各食陞缺之俸准其陞轉所遺員缺歸月銓選  
俟該員回京日照例補行引

見如此則員缺不致久懸而効力各員愈加感激矣

奏入於雍正十年閏五月二十八日奉

旨依議

大學士鄂爾泰等奏稱今歲自立夏以來訪得豆價因賣者無多是以價日騰貴八旗官兵每月所領馬銀僅敷餵馬不能致馬肥壯現今京通各倉所存變色粳米粟米既難久貯又甚宜於餵馬將此項米石分交八旗米局視米色高下以定價值著八旗都統

查明每月需用米數交該佐領各於本旗米局支領  
分給俟領馬銀時令照數交價其餘剩銀兩除買草  
外仍令買豆攪合餵馬似於兵丁馬匹均有裨益再  
城內養馬俱賴附近州縣各莊頭所種之豆及山東  
河南兩省商賈販賣之豆遇豆稍缺價即踊貴查山  
東河南兩省每年應交粟米除支給京城官兵外每  
年俱有餘剩又有歷年存倉粟米是以粟米甚屬豐  
裕嗣後請令山東河南兩省於應交粟米內每省改

交豆各五萬石運送至倉分交八旗米局著仍照糴  
賣糶米粟米例平價賣與拴馬官兵則八旗應需馬  
豆永遠足用價值自平而民亦樂於改米交豆似為  
兩便至於八旗官馬於四月出口時因青苗在地不  
便牧放是以沿途每馬一匹給空草一束至八月進  
口時因已收穫可以牧放故不復給草但沿邊內地  
收穫甚遲官馬進口時田禾大半未刈官兵因不便  
牧放又無力買草連夜趕行是以肥馬至疲疲馬至

瘦查張家口獨石口至京俱不過數站請於官馬進口時仍照出場例沿途支給空草

奏入於雍正十年六月初八日奉

旨依議

鑲黃旗滿洲都統鄂爾泰等奏稱臣等旗分叅領副叅領員缺除各實授三員外其餘員缺俱係署理此內有署理出征人員之缺者亦有署理出差人員之缺者如本員回任即令署缺之人迴避臣等請於伊

等迴避時不論其原署之缺只論其前後著後署理之人迴避令其候缺俟

命下之日行文八旗一體遵行

奏入於雍正十年六月二十五日奉

旨依議

吏部等部議覆據內閣中書常鈞奏稱請將各部院所送內閣存貯之副本概行鈐印庶將來有所憑據而奸胥猾吏覬覦改換等弊可以永杜等語應如所

奏嗣後各部院所送副本應概用鈐印存貯內閣以  
備查對又據奏稱嗣後八旗將考童生之時請令該  
旗先期申請本都統知會翰詹衙門令派科甲出身  
滿洲官一員會同各該佐領叅領面同考試既可以  
稽其頂冒之夙弊又可以別其文藝之優劣等語應  
如所奏嗣後每遇歲科考試之年俟禮部行文到日  
各該旗叅領先期申請本旗都統擬定考試日期行  
文翰詹衙門咨取科甲出身滿官一員在該旗公所

會同叅領佐領面同考試仍聽各該佐領點名識認  
以杜頂冒等弊試竣即將錄取童生數目呈明都統  
造具清冊移送禮部轉送兵部以便考試騎射

奏入於雍正十年七月初七日奉

旨依議

世宗憲皇帝諭行旗務奏議卷十



欽定四庫全書

世宗憲皇帝諭行旗務奏議卷十一

署理都統事務委署領侍衛內大臣果毅公訥親奏  
稱查佐領遇有遠差則另選官員帶領引

見令其署理佐領事務公中佐領缺出俱於二十日內辦  
理隨單用綠頭簽補授官員事件一同具奏補授惟  
原管佐領世管佐領缺出俱隨用摺子家譜承襲世  
職事件一同補授是以有至四五月補授者亦有至

十餘月補授者或有員缺因彼此互相爭告不便即  
行引

見懸缺至一二年者臣愚以為嗣後世襲官員並無責守

仍照例入於八旗用摺子家譜事件內補授外其原  
管佐領世管佐領缺出亦照補授公中佐領之例勒  
限一月令各該旗於限內辦完送當月旗入於單用  
綠頭簽補授官員事件內一同帶領引

見補授若於限內有不能辦理完結者令將情由聲明送

查旗御史令其稽察其員缺即揀選官員帶領引

見暫令署理俟將佐領原委查明時再將應補授人員帶領引

見補授如此庶佐領員缺不致久懸而佐領下事務可免遲緩隱匿之弊矣

奏入於雍正十一年三月十五日奉

旨這所奏是著照所奏行

辦理軍機事務大臣等議覆據次護軍統領辦事署

護軍參領馬爾泰奏稱軍營兵丁往往有寄家書要取衣服等物者伊等父母妻子節省月餉製辦衣物因無可託之人以致終年守候間有煩買賣人寄去者則計算觔數給與銀兩且或有被匪類詐騙者寄到物件實為不易仰請嗣後兵丁之家有欲寄送物件者不過十觔作為一包令各該旗收齊送部於運物赴軍營之便酌量搭運等語查各軍營兵丁之家所有寄送衣服等物煩人轉寄不無遺失若遇運送

官物之便一併搭運實於兵丁有益應交八旗曉諭該旗出征兵丁之家有寄送軍營衣服等物除力能自送或有相識可託轉寄者各從其便若無便可乘將所寄衣服靴襪等物不過十觔包裹封固各將旗分佐領名姓及駐劄地方開寫明白該旗彙總出具印文移送兵部俟戶兵工三部運物赴軍營之便分搭運送該將軍大臣等驗明旗分佐領職名交付本人仍將交付接受之處明白咨覆可也

奏入於雍正十一年三月十五日奉

旨依議

領侍衛內大臣會同八旗都統等議覆據侍郎兼副都統常有奏稱八旗出牧官馬自場回京常至疲瘦蓋因出牧兵丁每值陰雨恐馬匹驚逸即行圈置一處又不加意牧放看守及至倒斃遺失又恐賠補乃捏作因病倒斃著落在京拴養官馬之人賠補此等陋弊不可不嚴行禁止等語臣等伏思塞外夏月陰

雨無時若稍值陰雲即將馬匹圈圍馬匹自然不能  
肥壯應如常有所奏交與出牧之大臣營總等嚴加  
禁飭若夜值暴風大雨著將馬匹暫行圍守不使驚  
逸遺失若致遺失損傷即著落出牧之大臣官員等  
賠補若果因病倒斃令官員等查驗將所烙印記及  
馬尾一併割取呈明大臣營總等登記檔冊俟回京  
之日交各該佐領領取三箇月錢糧補立又據奏稱  
駝隻較之馬匹價值甚貴若有倒斃拴養之人不能

獨賠恐滋科派之弊等語嗣後應令佐領下力能拴養之官員或佐領本家拴養倘不加意餽養以致疲瘦倒斃即著落本人賠補若果因病倒斃稟明該旗大臣等動用官房租銀補立又據奏稱嗣後派往出牧請將訓練營之官兵派往再練熟習牧放馬匹事務之新滿洲索倫四十八人分派與滿洲蒙古旗分內令其教以拴弔牧放看守之方等語查兵部現今將去年出牧獲罪之官兵等議令今歲明歲遣往牧



場効力贖罪應俟至乙卯年再派訓練營之官兵出  
牧此派出官兵每日給與行糧一錢至於新滿洲索  
倫人等熟習牧放之事者亦少不必揀選伊等應交  
總管五十四由彼處牧場人內擇其熟習牧放之事  
者令其指教至塞外草衰自場回京之時令將馬匹  
緩緩趕行於何時進口及進何口之處預行報明兵  
部給與空草令其餽養又據奏稱每見不肖之人缺  
馬不補徒食空糧比及出牧之時給出牧人銀兩令

於口外買補亦有出牧後寄銀買補者等語查八旗官馬臨出牧時有口老殘疾者即令變價交出牧之營總等於口外買補但恐所變之價不足買補嗣後請將各該旗官房租銀兩令營總等酌量帶往有不足者添給買補用銀若干即於原拴馬之人錢糧內照數扣還可也

奏入於雍正十一年三月二十一日奉

旨依議

內閣議覆據署理副都統事務內閣學士佛凝義奏  
稱滿洲人等於繙譯固當勤學而辦事尤為緊要伏  
讀雍正元年至五年

上諭俱出自

皇上聖心指示實為萬世之典謨嗣後考試印房筆帖式  
請即將漢字

上諭為題令其繙譯取中者行走三年即以部院筆帖式  
調補等語應如佛凝義所奏嗣後印房筆帖式缺出

令該旗照例於前鋒護軍領催馬步兵丁內揀選通曉繙譯者咨送吏部如生監官學生閒散人內有願就考試者亦准其一體咨送吏部移揭內閣臣等於欽頒八旗雍正元年至五年漢字

上諭及內閣編次雍正元年至七年漢字

上諭內恭擇一道密封交與吏部令其繙譯考試取中者准其補放印房筆帖式其由兵丁選取者仍照例令食伊等錢糧米石由生監官學生閒散人選取者照

八旗左右司筆帖式之例給與無品級筆帖式錢糧米石三年期滿俟有本旗各部院筆帖式缺出即行調補其現在之印房筆帖式既非考試繙譯

上諭取中之人仍照舊例遵行

奏入於雍正十一年四月二十七日奉

旨依議

大學士張廷玉等議覆據副都統祖魯奏稱從前查驗何天培家產見伊家藏有

硃批奏摺何天培一家如此則凡類於何天培者可知請  
定追繳之法等語伏查直省督撫提鎮等員具摺奏  
事奉有

硃批諭旨者原令其下次奏事之時乘便恭繳屢奉  
諭旨欽遵在案今應令該部再行曉諭如從前奉有

硃批奏摺至今未繳者現任官即行恭繳若已經緣事降  
革及病故者或本身或家屬即呈明本省督撫本旗  
都統代繳倘再有隱匿收存者一經發覺從重治罪

至

賞給西洋鎖匙摺匣原令陳奏地方緊要事件最為慎重  
嚴密如該員調補京職或緣事降革自應即將摺匣  
繳進其收藏不繳之人實屬愚昧無知應將從前

賞過摺匣今已降革離任並調補京城官員內有未繳者  
查明令其繳進嗣後悉照此曉諭遵行至於

恩賜詩字原係獎勵臣工之盛典若該員干犯法紀例應  
追奪

誥命則

天章宸翰豈可仍容收貯嗣後除因公註誤及休致降調人員外若干犯法紀例應追奪

誥命之員並將

御書一體追繳將此永著為例

奏入於雍正十一年五月十三日奉

旨依議

戶部議覆據都統甘國璧奏稱出征兵丁內無家口



之人其坐糧銀米有交叅領佐領收貯者有交伊親屬收貯者兵丁未得早沾

天恩請將坐糧銀兩搭解軍營月米節存貯倉等語查出  
征兵丁同屬疆場効力其家中坐糧銀米皆所應得  
之項若將無家口之人給銀裁米似屬未當若將銀  
米交與叅領佐領收存或親屬收領又恐久存他手  
致滋弊竇應將叅領佐領收存兵丁餉銀並嗣後所  
領餉銀照搭解兵丁衣靴等物之例令各旗佐領加

緊包固將旗分佐領姓名並出征地方開寫明白彙  
齊咨送兵部遇有戶部兵部工部解送官物之便分  
行搭解軍營交與本人收領仍將收到之處咨覆其  
所存米石照例變價同餉銀一並搭解以後應領米  
石另行造冊咨送戶部扣存倉內俟大兵凱旋之日  
按照扣存數目支給本人若本人雖無家口或情願  
交存親屬令其代為製辦衣服什物亦未可定令各  
該旗都統將無家口之兵親屬代領銀米者造冊咨

送戶部行文軍前逐一詢明或將銀米仍令親屬收存或請搭解軍營之處俟咨覆到日照原議辦理可也

奏入於雍正十一年五月十七日奉

旨依議

八旗都統等議覆據副都統尚崇璧奏稱八旗增設看守倉庫兵丁此誠我

皇上愛養旗人增廣糧餉俾人人遂生樂業各得宣力報

効之路也但伊等既食錢糧即與披甲人無異應令  
學射備用等語查看守倉庫兵丁現分兩班輪流行  
走除值班之外並無別差且本佐領護軍馬甲缺出  
又於伊等內揀選好者頂補理宜令其學習拉弓射  
箭應如尚崇璧所奏嗣後看守倉庫兵丁內值班者  
即令值班官員教其演習拉弓其餘下班者遇本旗  
校射之日著該管看守倉庫各官帶赴教場以備該  
都統等校射如此則看守倉庫兵丁各得學習拉弓

射箭而頂補本佐領護軍馬甲之缺亦可得人矣

奏入於雍正十一年五月十九日奉

旨依議

禮部議覆據副都統曹煥奏稱

皇上特降諭旨於京城內建立昭忠寺享祀諸臣每年春秋遣大臣一員致祭臣愚仰請嗣後遇春秋致祭之期凡入寺諸臣之子孫在京居官及有頂帶者令太常寺行文傳知八旗併出示曉諭漢人是日令其分

班隨祭等因具奏奉

旨所奏是賢良祠王大臣之後裔亦當隨班行禮著該部一併定議具奏欽此該臣等議得崇德酬勲國家之盛典勸忠慕義臣子之至情今享祀之臣既已邀殊恩於奕世而其後裔亦當令其仰瞻廟貌感戴

皇仁追思先志於無窮應如曹煥所奏嗣後昭忠寺春秋致祭之期除照例遣大臣一員承祭外應令太常寺先期十日預行傳諭凡入寺滿漢諸臣之子孫在京

居官及有頂帶人員俱於祭日齊集寺內各按品級隨班行禮至賢良祠建立事宜今將告竣應欽遵

諭旨俟題請入祠之日即先期知會入祠王大臣之後裔至期齊集祠內分班行禮嗣後凡遇春秋二季亦應照例先期知會齊集隨祭可也

奏入於雍正十一年五月二十一日奉

旨依議

八旗都統等議覆據署都統印務護軍統領阿陽阿

奏稱現今佐領等有兼管步軍校者請令撥回本旗專管佐領事務此等員缺揀擇應陞人員另行補授等語查佐領一官係辦理一佐領事務教訓一佐領人等之員責任綦重若兼管步軍校之職必致貽誤佐領事務且佐領係四品職銜步軍校係五品職銜佐領兼管步軍校品級亦不相當應如阿陽阿所奏將兼管步軍校之佐領等悉由步營撥回本旗專辦佐領事務在該旗當差行走其步軍校員缺令各旗



另行揀選引

見補授

奏入於雍正十一年五月二十四日奉

旨依議

八旗都統等議覆據署副都統事務叅領發喀奏稱  
八旗火班處所有激桶二十四箇係晝夜預備火燭  
之用關係甚要不可不令習學操演等語臣等曾於  
救火處見步營官兵於應用激桶及應行拆斷房屋

等處甚覺熟練轉運激桶出水遠而且準其署副都  
統發喀所奏操演激桶之處應無庸議惟是失火之  
處閒雜人等在街道站立擁擠反使救火之人不能便  
利以致汲水不能速到至於齊集人多則未免紛亂  
且恐不肖之徒不無乘勢盜取物件等弊仰請嗣後  
遇有救火之事停止八旗激桶即將現今八旗所有激  
桶交與步軍統領衙門以備需用其激桶堆子處該  
班章京六員兵丁六十名仍著在火班處該班倘各

該旗汛地遇有救火之時該班大臣即於該班官兵  
內帶領一半前赴失火處惟將閒雜人等不許在就  
近街道中站立行走使街道不致擁擠汲水可以速  
到不但火可易於撲滅而失火之處亦無盜取物件  
之事矣其餘一半官兵仍留該班處備用但激桶既  
皆移向步營其六十名兵丁應需撒袋三十付併腰  
刀等物仍存於該班處遇有救火等事即令佩帶撒  
袋腰刀跟隨大臣前往防範管轄

奏入於雍正十一年五月二十四日奉

旨依議

八旗都統等議覆據副都統宗室色布肯奏稱八旗兵丁軍器數年以來雖經叅領佐領等嚴加整理終未齊備嗣後請將兵丁軍器逐一查明量其缺少件數之多寡扣除餉銀勒限造製等語又據禮科給事中戴齊奏稱八旗軍器關係緊要但年久弊生恐有不齊伏祈查明缺少器械造具清冊移送工部照官

價製造將官兵俸餉扣除還項等語查雍正二年三月內蒙

皇上特恩查明八旗所少軍器

賞銀製備今九年之內官兵盔甲不無敝壞弓箭等物不無缺少至於新補官兵其軍器亦容有未立者應將官兵軍器逐一查明造具清冊移送工部照官價合式製造分給官兵其動用銀兩造入俸餉冊內官作四季兵作二十月扣還原項交該叅領佐領等不時

查看如至年久有應行修理者亦照此例造給嗣後  
新補官員內如無軍器情願扣俸置備者亦照此例  
造給

奏入於雍正十一年五月二十六日奉

旨依議

八旗都統等議覆據副都統代林布奏稱每見襲官  
之家狃於得職互相爭執有以為非係親裔係為養  
子者又或以為私改家譜以近族為遠遠族為近者

紛紛控告至於佐領又非承襲世職者可比現今將八旗原管佐領世管佐領緣由清查釐定請交與八旗都統等將各該旗承襲世職補放佐領等之家譜交叅領佐領等逐一查對明晰呈堂有應詳查擬議者即會同八旗大臣等集議議定之後造冊一本鈐用都統印信恭呈

御覽後送內閣收貯又造冊一本用叅領關防佐領鈐記外其家譜內有名之人凡十歲以上者悉令畫押於

接縫處鈐用印信收貯各旗公署俟至十年將家譜  
修改一次等語應如代林布所奏凡承襲世職補放  
佐領等事造具清冊一本用都統印信送內閣存貯  
另造一本用叅領關防佐領鈐記外令十歲以上有  
名之人悉行畫押送該旗公署收貯俟至十年照例  
另行造冊用印存貯

奏入於雍正十一年五月二十六日奉

旨依議



正藍旗蒙古左司掌關防叅領拉布坦奏稱伏思

皇上格外施恩凡各省之防禦驍騎校等缺出將應陞之驍騎校領催等著該將軍酌量挑選預行咨送來京該部帶領引

見好者記名移送該省俟有缺出按名補授免其來京此誠我

皇上仁愛各省旗員至優至渥也臣查各省防禦驍騎校等缺出並不將某人之缺補授某人之處知照該旗

是以凡有行查外省官員事件該佐領處惟將舊有  
職員開寫夫各省官員俱隸在京佐領若無檔案則  
無憑稽查請於雍正元年起將各省員缺所補授之  
現任官員造冊咨送該部轉咨八旗外嗣後外省凡  
有補授防禦驍騎校等官將該員職名即行造冊移  
送該部如此庶有稽查不致錯誤矣

奏入於雍正十一年六月初八日奉

旨著交該部

大學士伯鄂爾泰等奏稱從前為緝拏北路綠旗營  
逃兵一案經辦理軍機處定議令臣鄂爾泰會同大  
將軍順承郡王等詳加定議等因具奏行文之後臣  
鄂爾泰已自軍營起身前來今准大將軍順承郡王  
等咨開准辦理軍機處來文內稱本處議奏查拏軍  
前逃兵一案應行文各本省嚴加查拏在何地隱藏  
後經發覺該地方官照例議處有將逃人拏獲者賞  
賜鼓勵拏獲之數多者交部議敘其軍營作何緝拏

不致逃走之處行文大學士鄂爾泰會同大將軍等  
詳加定議等因前來本處公同議得嚴禁容留逃人  
棲止並將拏獲逃人官兵議叙賞賚之處辦理軍機  
大人咨文內俱經詳細定議應毋庸另議外嗣後軍  
營兵役內凡有公事差遣私事告假者各該管官員  
營總確加斟酌如實係老成可信取保呈稟在營首  
領大人移咨該部該部照伊等所保辦給印信照票  
此遣往人等內如有逃者將原報該管上司等照例

治罪再綠旗人等並無馬匹難以追拏逃人其在大營四省綠旗人等每省各辦給官馬十匹查克拜達里克推河綠旗人等併在查克拜達里克鄂爾坤兩處種地綠旗人等各酌量辦給馬匹以便緝逃之用此拴養馬匹不無倒斃應每年補給一半若無故倒斃遺失即著落原交官員賠補仍行議處各營兵役內如有汲水採薪至晚未回者各該營一面揭報一面派賢能官員帶兵即騎本營拴養之馬連夜四下

尋踪追拏外該部仍照所報通行各該處嚴加查拏其拏獲逃人照刑部具奏新定之例治罪將拏獲逃人之滿洲蒙古綠旗官兵暫在軍營註冊俟年終造冊咨送該部獎議若將可以擒獲者不勤加追拏以致脫逃初次將官員註冊滿洲蒙古兵責二十七鞭綠旗兵責二十板二次將官員責三十板仍註冊滿洲蒙古兵責五十鞭綠旗兵責四十板三次將滿洲蒙古兵責一百鞭綠旗兵責八十板該管官罰俸一

年兼轄官罰俸六箇月之處註冊其兼轄官俟大兵  
凱旋交與該部查議外專管官現在軍前於應陞之  
缺停陞若該管官員將標下兵丁妄行擾累以致脫  
逃或連逃三名者即將官員革職在軍前當兵効力  
贖罪如此嚴加查拏逃人無所潛踪脫逃者自少矣  
等因前來臣等看得伊等所議軍營兵役於公事差  
遣或私事告假者令各該管官員取保給與照票前  
往於綠旗營內拴養馬匹追拏將逃人治罪其拏獲

逃人者作何鼓勵其不勤加緝拏者作何懲治等處  
俱經詳議均應照順承郡王等所議可也

奏入於雍正十一年六月二十二日奉

旨依議

兵部議覆據鑲藍旗漢軍右司掌關防叅領蘇博赫  
奏稱有原在副佐領或驍騎校任內應行降調事故  
現今已陞佐領或兼叅領及副叅領者應於何任降  
調之處並未定議再由佐領兼管副叅領之員佐領



任內有降級調用之處亦仰請分別定議如不便預  
行定議著於本內聲明等語查雍正十年閏五月內  
經吏部等部議定内外文武官員陞任後遇有原任  
事故應行降調者除貪婪酷刑行私等案情罪重大  
仍照原任降調其尋常因公詿誤等案情罪稍輕者  
俱照現任降調等因在案臣等請照吏部等部定例  
嗣後副佐領及驍騎校倘已陞佐領或兼叅領副叅  
領內遇有前任事故應議降調者除貪婪等案情罪

重大仍照前任定議將陞任及兼任一併降調外其尋常因公註誤等案情罪稍輕者俱視其現在職任內之最大品級議其降調將所兼各任一槩准留如此則議處之事得平而兼任官員益知奮勉矣又查雍正三年二月內本部會同八旗議定文武大小官員因公註誤係何任所得之罪降調何任之職等因遵行已久應將蘇博赫所奏酌定佐領兼副叅領降調之例併於本內聲明之處俱毋庸議

奏入於雍正十一年六月二十六日奉

旨依議

兵部議覆據都統韓光基奏稱查各省駐防將軍副都統以下以至防禦驍騎校等俱各由兵丁內挑選數人令其長班跟隨此等兵丁逐日跟隨不無與家人子弟賭博飲酒攬言公務之弊仰請嗣後各處駐防將軍官員等之親隨兵丁停其預行挑選長班跟隨令於所轄兵丁內輪班派出跟隨等語應如所奏

嗣後各省駐防將軍副都統以及防禦驍騎校等之親隨兵丁務於該管兵丁內輪班挑取令其更換行走如此則兵丁等勞逸均平而弊竇可除矣俟

命下之日通行各省駐防將軍等一體遵行

奏入於雍正十一年七月二十六日奉

旨依議

吏部奏稱查定例滿洲舉人應選用小京官漢軍舉人應選用知縣今鑲藍旗漢軍三保由滿洲額內中

式舉人既經該旗改歸漢軍咨送到部應將三保以  
知縣補用外仰請嗣後令各該旗於考試之時將應  
考人員詳加分別滿洲漢軍開註明晰咨送順天府  
註冊考試如有漢軍冒入滿洲額內中式者一經查  
出將咨送之該旗都統佐領等官交部分別照朦混  
造冊例議處該員照冒籍考試例革退舉人庶滿洲  
漢軍考試不致紊亂而內用外用亦不得任意趨避  
矣

奏入於雍正十一年九月初七日奉

旨依議

世宗憲皇帝諭行旗務奏議卷十一

欽定四庫全書

世宗憲皇帝諭行旗務奏議卷十二

戶部議覆據總理戶部事務和碩果親王允禮奏稱  
雍正十一年四月內經戶部請派部員會同各州縣  
將一切入官地畝價值租銀復行查勘確估等因具  
奏現在停止旗人認買今值初春尚未耕種便於履  
畝查估但應查地畝萬餘頃價值租銀為數甚多臣  
初任戶部未敢遽行派員伏乞

皇上海示遵行奉

旨入官地畝向來認買輸租皆已相安今若復行查估徒滋紛擾於旗民無益爾可傳旨不必派員復查仍聽旗人認買欽此欽遵該<sub>臣</sub>等議得入官房地上關庫帑錢糧下係旗人恒產向因冊檔混淆漫無稽考以致認買輸租紛紛錯官吏得以任意高下必須酌定章程方可遵照辦理謹將應行條款公同詳議恭呈

御覽



一認買入官房地宜分別定議臣等酌議嗣後除各州縣所有入官房屋仍應聽旗民認買外其八旗內務府所交入官地畝遵奉

恩旨惟聽旗人認買所有現交價銀並三限交價者仍照舊辦理其指俸餉認買者止准坐扣本身及同居之弟兄子侄俸餉不得指他人俸餉代扣至三限交價及指俸餉認買人員內如遇有事故無項可扣不能全完者仍將地畝入官另賣其交扣過銀兩按年計

畝扣除租數將多餘者給還原人如此則旗地仍歸旗人而旗人各得恒產矣

一具呈認買宜詳悉定議以杜諸弊嗣後凡呈買房地停其在部具呈如係八旗入官者令其在查收入官之該旗呈買如係內務府入官者令其在內務府呈買如係民人入官者令其在各該地方官處呈買仍令該處統以具呈月日之先後為準查明呈買人員旗籍俸餉出具保結移咨到部臣部查與原冊相

符者准其認買行令指交管業倘有無故拖欠及民  
人冒充旗人等事即將地畝入官仍將原保該管各  
官查叅設有二三人員在各該處同日具呈認買咨  
報到部者臣部詳查認買人員內以坐扣俸餉年月  
近者准其承買如坐扣年月相同以情願先交一半  
價銀者准其承買如皆交一半價銀以情願現交全  
價者准其承買如皆係現交全價則令伊等赴各該  
衙門籤掣准其承買或內有情願讓與同日具呈之

卷十二  
人員承買者仍聽其便如此則重複爭競之端可息而拖欠官價營私偏袒之弊可除矣以上二條是否允協伏候

諭旨遵行

奏入於雍正十二年二月二十二日奉

旨所奏是依議

都統兼工部侍郎韓光基奏稱京城各倉俱奉

旨派有都統副都統及御史等巡查凡倉內厰座不時查

看如有應行修理之處即奏請領帑興修其已修之工程俱各保固三年如三年限內坍塌者仍令監造之員賠修此定例也今巡查各倉都統等時有更換而修過工程並不移交冊檔以致續派之大臣官員等遇有應行修理之處其從前曾否領帑修理及業經修理曾否滿三年之限俱無憑可稽或致年限未滿已有坍塌又復領帑興修實屬靡費重支臣請嗣後凡已修工程經部查核准銷之後該都統等照依

原奏送部黃冊抄錄一本鈐用本旗印信即交與該倉監督存倉以備稽查其自雍正八年以來各該都統等已修工程請交與現今查倉大臣等查明原承修人員所修廠座工程詳細補造檔冊亦令鈐用現今查倉都統印信交與該倉監督收貯庶稽查嚴密不致靡費錢糧重複修理再查倉工向係查倉都統等具奏支領戶部銀兩自行修理奏銷若奏銷時或奉旨交部查核即行交部或奉

旨知道了即有藉稱已經奏銷竟不交部查核者既不交部查核其中有無浮冒及應否核減之處無由稽查  
臣請嗣後各倉工程該都統等奏請領帑興修告竣時停其自行奏銷令其造具清冊咨送工部照例查核其戶部給發銀兩之處亦即知會工部以備稽查併交與現在查倉大臣等將從前已修工程詳查如有未經交部查核者即令據實奏明補造清冊咨送工部核銷庶各倉工程俱由部查核而重領靡費之

獎自除矣

奏入於雍正十二年三月十三日奉

旨韓光基所奏是著照所請行從前各倉工程事件有奉旨知道了而未經交部查核者著一一查明具奏

八旗都統等議覆據原任副都統黃秉鉞奏稱坐臺廢員若向家中取辦盤費者准其在該管臺站大臣處呈請咨行該旗在伊家中調取由旗送部於運送兵丁等什物車輛之便搭解臺站給發本人再廢員



家中計其盤費將完有寄送銀兩者即在本旗呈請  
咨部搭解臺站給發本人取具領狀咨覆等語查坐  
臺人員除有可託之人照常聽其自便外如無可託  
之人照黃秉鉞所奏准其在該管臺站之大臣處呈  
請咨行該旗由伊家中調取送部於運送兵丁等什  
物車輛之便搭解臺站給發本人具由家中寄送盤  
費者該旗將所寄銀兩數目咨部亦於解送官物之  
便搭解令管臺站大臣給發本人取具領狀轉咨該

旗註冊

奏入於雍正十二年三月十七日奉

旨依議

兵部奏稱查臣部及八旗各省議處議叙案件並內閣交出特奉轉交抄錄案件一應清漢文

上諭均係交部後覆送內閣繙譯清漢文因向無定限是以每致遲滯再查八旗及各省駐防處叅奏奉

旨交部議處案件各該處有不將應議職名及該員加級

紀錄事故開明送部務俟臣部節次查催始行開送  
文移往返未免耽延時日以致案件不能速結且恐  
被叅人員乘間夤緣請託而不肖書吏探聽洩漏均  
未可定請嗣後凡由內閣交出特奉轉交抄錄一應  
欽奉清漢文

上諭即由內閣繙譯清漢文一併交出其八旗各省送到  
由臣部轉送內閣繙譯清漢文之

上諭即遵照部院事件定限十日內務令交部至八旗及

各省駐防處叅奏奉

旨交部議處案件於送臣部時即將應議職名逐一詳查開明並有無加級紀錄兼銜世職及陞轉事故出征之處分晰開寫送部以便定議此內或有應行咨查之處八旗定以十日之限咨覆其各省駐防處於文到日照依外省定限咨覆如有逾限不行交部咨覆者臣部即將逾限緣由於本內聲明照例附叅議處如此不但案件可以速結而夤緣洩漏之弊亦可剔

除矣

奏入於雍正十二年四月初一日奉

旨這所奏是依議

大學士伯鄂爾泰等議覆據都統佛標奏稱八旗補授外省旗員請定限每月一次引

見等語查現在八旗所有外省送到補授官員事件俱於三月二十四日起陸續到齊並未甚至遲延但補授外省旗員事件俱由當月旗彙奏若人甚少不便具

奏必需時日請嗣後補授外省旗員事件隨到隨即辦理於各旗奏事之日帶領引

見若

皇上進宮後仍令當月旗將並無耽擱之處具奏

奏入於雍正十二年五月初九日奉

旨依議

八旗都統等議覆據叅領馬啟奏稱鐵匠乃製造器械緊要匠役如有學習精熟者又挑為馬甲護軍反

不能得力嗣後請將不能騎射清語蒙古語之開檔  
戶下人等內擇其年力精壯者挑為鐵匠不准挑取  
別項差役令其專習鐵匠似於打造之事有益等語應  
如馬啟所奏嗣後除可挑護軍披甲之間散滿洲開  
檔戶下人等不挑取鐵匠外將不能騎射清語蒙古  
語人開檔戶下人等內視其年力精壯者挑為鐵匠  
不准挑取別項差役令其永遠習學行走再查八旗  
鐵匠每月支領錢糧一兩今既將伊等挑為鐵匠令

其永遠行走不准挑取別項差役若不分其等次則優者不能鼓舞請嗣後將鐵匠等交與該管大臣官員頭目等秉公分別挑選如平常者仍給一兩錢糧其學習稍優者作為三等給與二兩錢糧如學習更優者作為二等給與三兩錢糧其學習超等者即委為頭目作為一等給與四兩錢糧米石亦量其錢糧添給如此伊等必鼓勵勤學手藝可至精熟矣

奏入於雍正十二年五月十六日奉



旨依議

辦理軍機事務大臣等議覆據正紅旗蒙古右司掌  
關防叅領白達塞奏稱查八旗每年出場官馬俱於  
三月盡間挨旗陸續起程出場至八月初間陸續回  
京如遇春雨微少青草遲生之年肥馬反致羸瘦且  
八月間回場進口民田未及收穫沿途不無踐踏請  
令於四月十五日以後陸續起程出場則青草既生  
而肥馬不致羸瘦於八月二十日以後陸續回京則

民田俱已收穫不致踐踏等語應如所奏嗣後出場官馬俱令於四月十五日以後起程出場過八月二十日以後再令回場進京庶馬匹不致疲瘦而田禾亦不被踐踏矣

奏入於雍正十二年五月二十七日奉

旨依議

辦理軍機事務大臣等議覆據署副都統事叅領庫爾禪奏稱巡捕三營綠旗兵丁缺出於八旗漢軍旗

下間散壯丁內挑取但伊等陞革之處並不行文知會該旗是以被革之人到旗口稱因病告退今已痊愈求在旗下披甲者有之伏祈嗣後將綠旗兵丁陞調革黜之故令步軍統領衙門行知該旗等語查巡捕三營綠旗兵丁如有陞調或因病告退或獲罪革黜等情若不行知該旗實屬不合應如庫爾禪所奏嗣後巡捕三營所挑漢軍旗下壯丁內遇有陞調黜革等情令步軍統領衙門行知該旗外其因病告退

之人如病愈後不准在旗披甲令在巡捕營具呈仍  
補綠旗兵丁

奏入於雍正十二年五月二十八日奉

旨依議

禮部議覆副都統宗室章格奏稱諸王大臣官員在  
午門前常朝處齊集此係

國家大典今見大臣官員等或班聯不齊或越次拱揖  
或聽聞散人役任意往來攬越行走如不通行曉諭

必致罔知禮法等語查

會典內開凡遇常朝日各官入班後有越次拱揖聚談慢易不恭者糾儀官題叅各官班次俱照品級序坐違者叅處等語是常朝各官坐時理宜整齊嚴肅若不遵定制攬越常班以致禮儀舛錯非所以肅觀瞻而昭典禮也應如董格所奏嗣後每遇常朝日大臣官員入班後俱宜各遵定例按品級依次序坐如有不遵定制攬越失次或有起立拱揖聚談不恭者糾

儀御史同吏部禮部所派官員即行指名題叅如狗情不行叅奏者一併議處再上朝坐班其看守

午門端門東西兩闕門官兵理應將閒雜人等攔阻不得任其出入行走攙越班聯嗣後倘再有不遵定制亦令糾儀御史等指名題叅分別議處至諸王所騎馬匹每逢常朝坐班時應牽立於闕門外候朝畢時牽進不得於常朝坐班處站立如此則朝班整而典禮愈光矣俟

命下之日通行傳諭八旗各部院衙門一體遵行

奏入於雍正十二年六月初七日奉

旨依議

八旗都統等議覆據署副都統事護軍叅領鄂鼎奏稱  
新營房居住之八旗漢軍烏鎗兵丁於春秋二季每  
季著八旗排列隊伍合操一次則八旗操演得以畫  
一而兵丁等演放烏鎗亦可熟練於看守之處更有  
裨益等語查八旗居住新營房之兵丁內每旗滿洲

箭手一百二十名蒙古箭手四十名漢軍鎗手四十名共二百名八旗漢軍鎗手共計三百二十名除每日派往看守城門該班並查拿匪類之兵丁外其各旗所餘兵丁無幾八旗難於排隊合操且現今管新營房之大臣等業將八旗居住新營房之漢軍鎗手每季每人關領四十五日火藥於各該旗地方逐日排列隊伍演放連環且每季各翼仍四旗合操二次演放連環今鄂鼐條奏令新營房之漢軍鎗手等八



旗合操之處應無庸議又查伊等現今雖演放過堂連環但用鉛子演放標準最為緊要臣等請照訓練營之例嗣後交與該管營房大臣等每月每人關給鉛子十枚著該管大臣官員等量其閒暇之日樹立標準演放準頭至所需鉛子著該管大臣等每月移咨工部關領

奏入於雍正十二年六月二十三日奉

旨依議

吏部議覆據副都統雅虎奏稱八旗世職缺出該旗辦理摺子家譜奏

聞承襲內有恭遇

恩詔所加之官承襲時並不銷去照舊歸併承襲俟吏部題覆後始行銷去該員於未經部覆之前仍以

恩詔所加職銜穿帶頂補支領俸祿但頂帶補服原以分別職員之品級俸銀俸米關係

國家之錢糧俱不得僭越請嗣後如

恩詔之官遇有缺出應行銷去者令各該旗即行咨明吏部查對檔案如有應行銷去之處俟部文到日該旗將應銷之處於襲職摺內聲明併家譜呈

覽具奏承襲如此則應襲之職庶無僭越之端而吏部亦無庸題覆等語應如雅虎所奏嗣後八旗世職缺出該旗即將出缺緣由併世職

誥勅移咨

臣部

臣部查對檔案有恭遇

恩詔加給之官應行銷去者查核明確銷定職銜咨覆該

旗該旗照依

臣

部核定職銜繕摺具奏承襲奉

旨後仍咨

臣

部註冊揭送內閣添寫

誥勅俟

黃檔修完之日照例於歲底奏明填寫

黃檔再查八旗世職又有

詔後加授之官襲次已完應行銷去者亦應

臣

部查對明

確核定職銜然後承襲始無遺錯

臣

等請嗣後八旗

世職凡遇缺出即行移咨

臣

部查明核定職銜咨覆

該旗再行承襲

奏入於雍正十二年七月初二日奉

旨依議

八旗都統等議覆據鑲紅旗蒙古右司掌關防叅領  
八十五奏稱請飭令八旗大臣嗣後將由當月旗齊  
集三議大臣等會議事件與會議應行畫一事件俱  
照議奏之事著齊集之大臣等詳細定議將定議之  
處立稿於稿尾開列大臣等職名畫押若有別項差

事不得齊集之大臣即將所立之稿送閱如與事理相符即行畫押有與意見不合之處據理更正視其事之緩急另行齊集定議畫一遵行等語查八旗凡有畫一定議事件俱由當月旗齊集八旗大臣等畫一定議然後咨行該旗遵照辦理此內若遇有別項差事不得齊集之大臣與衆大臣所議之處意見不合者必俟另行知會復行會議勢必與已遵前議辦理之事互相參差應如八十五所奏嗣後八旗若有

畫一定議事件亦照議覆具奏事件交與齊集之大臣等詳細定擬將定議之處立稿於稿尾開列大臣等職名畫押如有別項差事不得齊集之大臣即將議定之稿照寫送閱如無與意見不合之處俱各畫押然後轉發該旗遵照辦理

奏入於雍正十二年七月初七日奉

旨依議

八旗都統等議覆據署副都統事叅領伊蘭奏稱

八旗舊教場居住之兵丁俱在各處當差行走是以該管教場之章京驍騎校等不能遍行稽查每有成羣聚飲賭博等習且教場內多有漢人租賃房屋開設酒鋪貨賣食物者於兵丁生計大有不便請將教場內開設鋪面之人盡行逐出再於教場所屬驍騎校五員內擇其人去得能管轄者一員委作副章京令其與正章京公同管理仍於每街居住人內擇其老成守分者二人一為正街長一為副街長令其不



時巡查如五年內管約得法即於應陞之處列名若不嚴行查管以致有犯賭博酗酒等事者即交該部治罪至委署章京補授街長即令管教場之章京揀選呈驗該旗大臣等語應如伊蘭泰所奏於現管舊教場之滿洲蒙古二旗護軍校驍騎校七員內著滿洲蒙古兩旗大臣會同揀選一員委署章京協同正章京管理仍於每街居住人內擇其能管約者二人一作正街長一作副街長即令查管飲酒妄為之人凡

係肩挑及開設鋪面貨賣食物者照常准其貿易外  
止將賣酒者嚴行禁止如禁約得法於應陞之處列  
名如不嚴行查管仍有賭博飲酒等事即交部查議  
仍於舊教場居住之兵丁內特派十名每日隨章京  
街長等在教場內查拿飲酒賭博之人其所派章京  
首領兵丁實心巡查者議叙鼓勵其不實心巡查者  
懲治議罪作為定例

奏入於雍正十二年七月初七日奉

旨依議

八旗都統等議覆據鑲紅旗蒙古右司掌關防叅領  
八十五奏稱八旗年幼佐領及出差佐領等缺俱係  
揀選賢能官員令其署理佐領事務但此項需員甚  
多其官多之旗尚可得人若值官少之旗於署佐領之  
缺人材既屬難得員缺又不可虛懸乃不得已將品  
級相當之員草率揀選引

見令其署理仰請嗣後遇署佐領缺出如不得人即將現

任佐領等擇其能者一併揀選引

見令其兼辦二三佐領事務等語查佐領之職甚屬緊要若不得人草率揀選補授實於佐領事務無益嗣後除得人旗分仍照前例辦理外如不得人旗分應如八十五所奏於佐領內擇其人去得者引

見令其兼管至於署佐領內有實授佐領者從前所管之佐領仍令兼管

奏入於雍正十二年七月初十日奉

旨依議

兵部議覆據署副都統事叅領八十奏稱城門尉之缺俱係將滿洲旗分官員開列並無開列蒙古旗分官員之例但看守城門兼有滿洲蒙古旗分兵丁仰請嗣後城門尉缺出將蒙古旗分內之漢仗好能管轄著有勞績之員一併揀選列名引

見補授等語查外省駐防處協領等官從前並無補授蒙古旗分人員之例

皇上特恩將蒙古旗分官員亦令揀選補授實一視同仁之至意應如八十所奏嗣後城門尉缺出將蒙古旗分內之人去得能管轄者亦行揀選同滿洲旗分內之官員一併帶領引

見補授俟

命下之日通行八旗一體遵行

奏入於雍正十二年七月初十日奉

旨依議

八旗都統等議覆據正藍旗滿洲左司掌關防叅領  
明山奏稱出牧之副都統等行文京城俱用無印信  
封套伏思京城各部院八旗彼此行文悉用印信封  
套則牧場處行文京城尤為緊要請令用印信封套  
等語查京城各部院八旗一應文移俱用印信封套  
者所以杜作弊之端也惟出牧之副都統等並無印  
信是以行文之事祇用白文差人齎送誠恐不肖之  
徒於途中作弊私行改易請如明山所奏嗣後出牧

之副都統等於臨起程之際將該旗都統印信鈐用封套量其足用帶往再酌量封套之數將用印紙張亦令帶去遇行文之事令其動用自收場回京之日將用過及所餘數目告知該都統等註冊如有餘剩封套紙張公同驗看銷燬如此則事有實據弊竇可除矣

奏入於雍正十二年七月十三日奉

旨依議



八旗都統等議覆據副都統尚崇璧奏稱八旗礮局所貯礮位及一切應用之物有特派叅領一員管理臣等查其收貯之項並無檔案可稽而叅領交代時亦惟以現在收貯之物互相授受倘有遺失損壞等項亦並無案可查伏思礮位乃

國家緊要軍器關係匪輕使無檔案可查似屬未協仰請

勅下八旗令各該旗礮局將現貯礮位及一切應用之物

詳細查明造具清冊二本鈐用都統印信一本送部  
一本存各該旗以備詳查凡叅領等交代時亦照冊  
出具保結再行交代如此則礮位無損壞之虞而一  
切應用之物亦斷不致有遺失等語應如尚崇璧所  
奏交管理礮局叅領等將現在所有礮位併一切應  
用什物詳細查明造具清冊二本鈐用都統印信一  
本送工部備查一本留該旗收貯嗣後該管叅領等  
接任交代亦照此冊查明果無殘缺損壞之處出具

保結再行交代如有徇情接受者查出據實叅奏交部議處將所有殘缺損壞之物著落該員名下照數賠補

奏入於雍正十二年七月十二日奉

旨依議

八旗都統等議覆據都統李禧奏稱先經原任都統耿化祚奏准每佐領下派委馬兵二名幫助催總抄寫每年所降

上諭併來文二本一本存貯佐領處一本存貯副佐領處  
如改換佐領即將此檔案交代等因在案八旗佐領  
下雖不敢怠惰從事或只有一本者或亦有一本仍  
不全者請

勅交八旗如檔案有不全者限於雍正十二年歲底補寫  
完全呈送叅領查對鈐用關防其本年應抄之來文  
每季造檔呈報叅領鈐用關防俱於次年三月內全  
行造完呈報叅領轉報都統等登記檔案令離任接

任官員彼此交代等語查凡有各處來文登記檔案者特為日後稽查不可使檔案不全應如李禧所請曉諭各旗叅領佐領等併都統衙門除檔案全者不議外其檔案有殘缺者俱於本年歲底全行造完亦鈐用關防呈報都統等存貯嗣後如有離任接任者彼此交代俱照此遵行

奏入於雍正十二年七月二十日奉

旨依議

吏部議覆據都統董象緯奏稱八旗當月旗部院衙門一應往來文移俱屬公務有錢糧刑名等件所關綦重若文移內有應駁者俱應回明堂官司官用印文駁回方不致錯悞今每見駁回文書止憑一收文筆帖式並不回堂司官聲明駁回之故又不登記號簿及至錯悞遲延無憑查考恐其間弊竇易生殊非慎重公事之意臣請嗣後凡一應往來文移內有應駁者必回明堂官聲明所以應駁緣由用印文駁回

有不合式不應收者亦必回明司官聲明不收緣由  
註寫司官銜名登記檔案鈐用司印其發回原衙門  
亦須登記明白如此則文移之應收應駁俱有憑據  
於旗部事務似有裨益等語應如所奏通行八旗部  
院各衙門凡一應往來文移內有應行駁回者必回  
明堂官聲明所以應駁緣由用印文駁回其文移有  
不合式不應收者令當月官呈明該堂官駁回將緣  
由事件登記檔案鈐用印信

奏入於雍正十二年七月二十三日奉

旨依議

八旗都統等議覆據署副都統事護軍叅領額爾圖奏稱除八旗所有開戶過繼養子人等內有已至前鋒護軍領催者俱各另行記檔外伊等子弟及本身原係開戶養子已入另戶檔內之人遵

旨自行首出彼時因未至前鋒護軍領催不准另記檔案此等之人既經一例行查亦應准將伊等註入另記



檔內仍分晰族支係何人之子孫編次支派照戶口造檔鈐用印信收貯存記等語查開戶養子人等內有已至前鋒護軍領催後遵

旨將本身實情首出另行記檔人等之子弟以及從前詳查之時未至前鋒護軍領催已入另戶檔內之開戶養子均屬一體若不另行記檔恐有不肖之徒將來不無混行訛詐等弊應照額爾圖所奏遵

旨自行首出實情另行記檔人等之子弟以及曾經詳查

之時未至前鋒護軍領催已入另戶檔內之開戶養  
子俱令各該旗復行確查分晰族支編次支派按其  
輩數註明何人之子何人之孫每佐領下造具清冊  
二本鈐用印信一本存貯該旗一本咨送戶部永遠  
備查將總數交當月旗彙齊奏

聞此次行查若不將實情首出有敢隱匿者或被查出或  
被旁人首告從重治罪如奉

旨查明後又復夤緣串通冒入滿洲檔內者除治罪外仍

記入開戶養子檔內再伊等挑選前鋒護軍併得

恩賞銀兩等處俱照原奏定議給與另行記檔之人如伊等內有軍前行走衆著有勞績或漢仗好人去得辦事好有品行之人著該旗大臣預將緣由聲明奏聞帶領引

見補授官職如遇比丁之年伊等有添裁之處亦如丁冊一體造寫

奏入於雍正十二年七月二十五日奉

旨依議

工部議覆據副都統金繼祖奏稱看得現今京城內  
外有奸詐商人乘機射利開設木廠名曰拆貨鋪伊  
等合夥買房拆分磚瓦木石售買又有串通不肖旗  
人具呈認買官房即行拆賣將所賣之銀交官餘剩  
者均分又有以俸餉抵買年限未滿即私行拆賣者  
臣請嗣後凡房屋破損無力修理者不論所買官房  
自置之房若係城內者令其報明步營城外者報明

司坊官於十分內准折賣三四分以為工價之需不准過半務令步營司坊官查驗明白將所遞之呈批准註冊後始准木廠拆買等語查五城內外官民房屋新舊不齊或因房院層數甚多折毀數間以圖寬大或因年久漸至倒壞將大改小以便居住或因損壞舊房難以變賣務必折賣以濟急用乃民間常有之事若嚴行禁止務令報官始准折毀不惟繁擾實多不便況拆舊可以修新移此可以蓋彼若嚴禁拆

賣民間興修俱買新料則價值必致騰貴而修理愈難矣應將金繼祖所奏禁止拆賣房屋並不准拆毀過半之處均無庸議至於京城房院理應接連整齊始有益於觀瞻防守嗣後旗民人等無論自置認買官房若整齊堅固不准無故拆賣射利花費倘迫於必用只准將院內零星房屋拆賣其臨街羣房修補之處各聽其便惟不准盡行拆賣相應行文令九門提督轉飭步營五城御史轉飭司坊順天府轉飭大

宛二縣出示曉諭如有違禁者查拏送部治罪旗人  
抵買官房其俸餉坐扣未完即行拆賣者實有負  
皇上愛養之深恩請交八旗嚴行禁止不時稽查倘仍有  
違禁者從重治罪俟

命下之日行文九門提督順天府府尹五城御史管理街  
道官員並八旗一體遵行

奏入於雍正十二年八月初八日奉

旨依議

戶部奏稱查八旗兵餉從前皆係領催赴庫支領臣部惟恐有代領侵漁更換成色之弊是以行令各旗派委官員親身赴庫領取散給以杜弊竇現今各旗支領錢糧雖俱有官員赴庫但放給銀兩之時俱不留心驗看仍令領催等承辦此內倘有侵漁缺少之處反以庫平為輕造言掩飾伏思錢糧係兵丁養贍所關甚重仰請嗣後務令叅領佐領驍騎校等員赴庫與庫官公同平兌令其領取仍將該員等職名存



記檔案領去之後務令親身驗看散給倘仍有託付  
領催以致侵漁缺少之處該旗即行查叅俟

命下之日移咨八旗一體遵行

奏入於雍正十二年八月二十六日奉

旨依議

副都統覺羅蘓爾泰奏稱伏思

皇上親祭

壇

廟凡八旗不齋戒之官俱穿朝服佩刀齊集

午門外於

聖駕出入時跪接其執事之校尉親軍並管轄之護軍步軍以及與大臣侍衛等牽馬之親軍俱於

午門外齊集伊等俱有該管大臣官員等查認放入東西闕門約束惟八旗不齋戒之官員並無人查認約束以致任意出入不按班預行排列至

聖駕出時以致濫行跪接殊與

大典不合請嗣後遇

皇上親祭

壇

廟令每旗於叅領內派能管轄者二人令其查認各旗齊集官員放入約束令伊等按班次預行排列俟

皇上出入時即行跪接庶不致紛擾於

大典更加肅敬矣

奏入於雍正十二年九月初一日奉

旨這所奏甚是照所奏行每翼再派監察御史二員查旗  
侍衛章京二員令其稽察

戶部議覆據副都統祖魯奏稱竊臣於康熙六十一年曾在河工見遠年効力旗人在外所生之子孫居住沿河地方者甚多伊等在外既久生長之子孫語言舉止竟於土著之民無異且有與本地民人結為婚姻者既不報入丁冊該旗無由稽查必漸至冒籍為民懇請

勅下河道總督將康熙三十七八等年前後在工効力之旗人俱挨年按冊逐一清查如有毫無事故任意逗留者即行查解歸旗外嗣後河工効力旗員統以三年為率令該河臣詳加考核其不能熟習河務者即行咨送回旗如實係諳練河務可以留工効力之員其在外家口請照外省駐防官冊報幼丁之例於初生之時即行報明河道總督移咨該旗存案如有增減等情於三年比丁冊內申明若子弟年至十八歲

以上者亦照定例催令歸旗當差肄業倘有隱瞞不報一經查出即行叅奏照例治罪等語應如祖魯所奏行文河道總督將從前在河工効力旗員及旗員之子孫逐一清查其中如有並不効力行走任意逗留者俱令歸旗當差肄業其現今効力旗員以三年為率應令詳加考核其不熟習河務者照外任旗員之例勒令按限歸旗至諳練河務應行留工人員其家口悉照外省駐防之例三年一次分別旗分佐領

註明三代造具丁冊併聲明增減等情移咨該旗查核其子孫年至十八歲以上者俱令歸旗當差肄業倘有無故逗留併隱瞞丁口等弊經河道總督及該旗都統等查出即行指名叅奏照歸旗違限例治罪俟命下之日臣部通行各省河道總督併八旗都統一體遵行奏入於雍正十二年九月初九日奉

旨依議

監察御史張鵷奏稱伏思歷年條奏事件均闕典禮

政務既經部議奉

旨准行各該衙門自應實心奉行方不負我

皇上勤求治理之意如不定以稽察考成但恐日久廢弛

或有陽奉陰違沉擱不行亦未可定請

勅下該部通行內外各該衙門查明積年奉

旨准行條奏事件內有沉擱未行者著定限補行若條奏

內有不便遵行或有應增應減之處著各該衙門將

如何不便如何增減之處據實題明更正造具清冊



咨送該部查核遵行嗣後如仍有陽奉陰違沉擱等  
弊一經查出照例議處如此則准行條奏事件不致  
有遺漏沉擱之弊而於吏治民風大有裨益矣

奏入於雍正十二年九月十二日奉

旨所奏是著照所奏行

監察御史廣明奏稱

臣

自查倉以來每見王公包衣

佐領及渾托和之披甲人等領米每披甲一名其朋  
食者或五六人俱持票進倉爭先領米以致擁擠其

間不無舛錯伏祈

勅下下五旗都統轉飭王公色衣官員等嗣後領米時止  
許披甲本身隨領催進倉領米其朋食人等毋得擁  
擠爭進則人數少而舛錯自無矣仍令各倉監督嗣  
後放米時須酌量天時之長短一日之內可放米若  
干石預行曉示務將若干佐領之米於本日盡數放  
完則立法嚴而諸弊自清矣

奏入於雍正十二年九月十二日奉

旨這所奏是照所請行

禮部議覆據副都統宗室塞布肯奏稱八旗外省駐防人等赴京考試只向該將軍城守尉告假並不攜帶憑據隻身到京在本佐領下告稟咨部准考其間恐有混冒頂替之弊仰請嗣後如赴京考試者俱在該將軍城守尉處具呈聲明緣由行文該旗仍給印文以為憑據等語應如所奏嗣後凡外省駐防人等赴京考試者應令各省駐防之將軍城守尉等預先

取具本人三代年貌造具滿漢清冊聲明係某旗某  
佐領下人出具保結咨送該旗再將該生之年貌註  
明出具印文給發本人親身投遞在京該旗該旗憑  
印文查對造冊報部考試如此則假冒頂替之弊自  
無矣俟

命下之日臣部行文八旗外令兵部轉行各省駐防將軍  
城守尉等一體遵行

奏入於雍正十二年九月十四日奉

旨依議

戶部奏稱查得正黃旗蒙古都統咨稱本旗叅領兼佐領阿達哈哈番舒瑚爾所有本身入官地三頃折銀三百八十八兩伊指本身俸銀作六季坐扣認買已扣過俸銀五季尚有一季俸銀未扣今因舒瑚爾革職現追得銀六十三兩交部等因前來臣等細查官員拖欠錢糧理應依限完納以清帑項如限內並無交納之銀始將房產抵補欠項免其叅處治罪此實

曠典未有將本身入官之產業復又指本身俸銀認買之理  
今舒瑚爾身為叅領因未完公庫銀兩從前叅奏冀  
免議處將地畝入官後復指俸銀認買較之情理殊  
屬不合除將舒瑚爾交部議處外伊所認買此項地  
畝及扣過之俸銀並現在追出之銀一併入官臣部  
前任之堂司官並不詳查據准認買亦屬不合亦乞  
交部查議嗣後凡拖欠錢糧之人所有本身入官地  
畝除伊分家另住之叔伯兄弟有情願認買者准其

認買外至伊本身及子孫槩不准認買如有濫行遞呈  
濫准認買者將遞呈認買之官兵分別議處准其認  
買之該管官員交部查議俟

命下之日通行八旗內務府並直督轉飭所屬遵行辦理  
再從前如有認買本身入官之房地者臣部查出亦照  
舒瑚爾之例一體入官

奏入於雍正十二年九月十七日奉

旨依議

八旗都統等議覆據鑲黃旗蒙古右司掌關防叅領巴爾泰奏稱從前滿洲火器營兵丁於馬上演習一鎗一箭後因歷年久遠兵丁內能習此者漸少而新批人等年幼者居多雖令學習騎射馬上終屬生疎請照從前教訓伊等令於馬上演習一鎗一箭如有善於騎射放鎗者委放頭目以示鼓勵等語查滿洲火器營兵丁於馬上操演一鎗一箭之處較尋常操演放鎗騎射更屬緊要雖從前火器營兵丁曾於馬



上學習兼放鎗箭但歷年久遠並未操演而新挑補之年幼兵丁內馬上能兼放鎗箭者為數無幾今若不嚴加操演則此項技藝漸至廢弛臣等請照巴爾泰所奏滿洲火器營兵丁令其在馬上演習鎗箭但不必一槩均令操演現今訓練營每旗拴養官馬一百六十匹著令陸續乘騎演習若內有勉勵勤學馬上放鎗射箭好者亦照所請著令記名委放頭目以示鼓勵遇有伊等應陞之處列名如此訓練學習不

惟滿洲火器營兵丁各知鼓勵勤加黽勉而新挑年  
幼兵丁亦得於馬上學習騎射烏鎗矣

奏入於雍正十二年九月十七日奉

旨依議

侍讀學士舒魯克奏稱伏思我

皇上臨御以來降

旨著年老大臣等在

紫禁城內騎馬乃優恤大臣

特恩也為臣子者自當謙讓以盡敬謹之道臣見

紫禁城內騎馬行走之大臣竟有騎馬經過

文華殿者

文華殿內供奉古

聖帝王神像而中間設有

皇上寶座諸王大臣等至

文華殿門理應下馬過門再騎始為合宜

奏入於雍正十二年九月二十二日奉

旨所奏是著交前鋒統領護軍統領等遵行

戶部議覆據護軍統領蘇爾鼎奏稱現在內外大小  
官員支領俸銀俸米俱按品級定有成例今八旗致  
仕大臣亦照現任大臣支領俸祿伏思伊等俱係閒  
居非在任供職人其從前果係効力者蒙

聖主施恩

賞給整俸者有之

賞給半俸者亦有之其但

賞與品級致仕之員即給以整俸似屬不合嗣後除奉  
旨賞給俸祿致仕之大臣外其止

賞給品級致仕之大臣內如身有世職者應照未及年歲  
未曾行走之世職官員例給以半俸如身無世職者  
無庸支給俸祿等語查

會典內開載康熙十二年議准旗員年至六十歲告老  
解任者查明歷俸深淺有無効力應否給與半俸具  
題請

旨年未至六十告病解任者不准給與半俸等語是致仕  
旗員領俸久有定例若槩給與整俸與例原屬不符  
應將八旗致仕官員除奉

旨賞給俸祿及身有世襲官職未經承襲子侄者應如蘇  
爾鼎所奏照未及年歲未上衙門之世職官員例給  
以半俸外其餘致仕之大小官員仍照

會典所載令該旗都統據實確查具題請

旨恭候

命下之日行文

臣

部遵照辦理未至六十歲告病解任者

無庸給與

奏入於雍正十二年九月二十五日奉

旨依議

和碩果親王允禮奏稱伏查雍正元年二月內曾經  
奉有

諭旨密摺不許與人叅酌今乃不惟叅酌抑且相為售授  
矣如戶部諸務前經怡賢親王經理妥協及臣管理

以來漸加參考併工部諸務亦經臣逐一釐剔凡更改之件有應具奏者則奏請遵行其細微之事則與本部大臣公同酌定均有冊案可稽今則有依稀撫拾而為條奏者即如部院設立副稿貼寫姓名年貌文冊鈐蓋印信稿面司官畫押等類皆係戶工兩部各堂酌定已行之事冊檔可稽稿案有據今皆拾為條奏非特苟圖塞責亦且煩瀆

聖聰今

臣

留心訪察乃聞條奏者並非出自本意或取於



書辦之口或售於匪類之人故將部院內已行之事  
掠為已有列為條奏此誠無益於政務且非密勿進  
言之道臣謹據實奏

聞伏乞

皇上諭令各部院衙門凡議條奏事件有已行者即將現  
在已行緣由聲明具奏如侍郎等員及御史兼辦部  
郎事務有細微之事在本員之部院大臣足可酌定  
辦理不行呈明酌定率為條奏以圖塞責者交部分

別查議倘本員已經呈明而該大臣掣肘不行酌定  
仍准令條奏於奏摺內聲明緣由如果應行之件則  
將該大臣交部議處以爲玩忽公務之戒至於羣相  
叅酌售買條陳撫拾舊事混行瀆奏者從重治罪如  
此則進言者皆出已誠庶幾仰副

皇上博採羣言之至意矣

奏入於雍正十二年十月初四日奉

旨果親王所奏是著交該部照所奏行併通行曉諭輪班

條奏之大臣官員知之

八旗都統等議覆據都統李禧奏稱查城上並各該班處所有鳥鎗並未備有火藥鉛子其長槍之柄多係松杉等木不及攢竹白蠟等木又查步軍該班處之軍器亦復如是其腰刀短小而不銛利者亦甚多臣請交與八旗該管大臣官員等凡軍器務令堅利整齊等語應如所請將城上以及火班並九門看守等處軍器俱交與各該管大臣等每鳥鎗一柄預備

十出火藥鉛子烘藥火繩等物令其輪班交收其長  
槍之柄務令更換攢竹白蠟等木其腰刀務令佩帶  
長而銛利者步軍營各該班處亦交與提督照此辦  
理但各該班處俱令一時更換難以辦理應勒限一  
年陸續更換更換整齊之後倘仍有不堅利整齊者  
一經查出將該管大臣官員等交部查議

奏入於雍正十二年十月十四日奉

旨依議

八旗都統等議覆據都統宗室塞貝奏稱查八旗各  
甲喇學內之教習俱係由驍騎校兵丁內挑取者不  
能講解書理教導禮節請魚於本旗因公墨誤革職  
人員內年四十歲以上通曉滿漢書或通曉滿洲蒙  
古書情願教誨餘丁者著該都統等試看揀選令為  
教習等語應如塞貝所請將八旗現在教習內之驍騎  
校兵丁試看其優者仍留為教習不能者即行革退  
將廢員內好者補行挑取其所挑廢員若無錢糧難

以行走遇本旗馬甲缺出令其披甲給食錢糧米石至一年後試看教習劣者即行革退永不叙用其教習優者准留至三年著該旗大臣等奏明帶領引

見記名視各該旗看守倉庫官缺出即行補用其考留之舊教習俱係現任官員兵丁值伊等應陞之處俾得列名

奏入於雍正十二年十月十四日奉

旨依議若挑取廢官著該旗帶領引見

副都統祖魯奏稱伏查文職旗員內有才具平庸難勝部屬州縣之任者蒙

皇上天恩著以旗缺對品補用此誠

聖主格外之隆恩整理旗務之至意也但此項人員弓馬既屬生疎而於旗務又不諳練若無指定之缺恐至補用之時有任情愛憎高下其手之弊伏乞

勅下該部就其品級擬定銜缺如科道郎中道府等官著以副叅領公中佐領補用員外郎同知知州等官著

以步軍校副佐領補用主事通判知縣等官著以驍  
騎校補用其司府衛之首領州縣之佐貳以及筆帖  
式等官俱著以副驍騎校補用該員等一經到旗即  
著在伊等指定之缺効力行走該旗大臣仍留心試  
看如有技藝生疎行走懶惰者即行叅奏照例治罪  
若果奮志黽勉著有勞績試看一年之後遇有應補  
之缺該旗大臣將伊等辦事行走之處據實出具考  
語與該旗應陞之員擬定正陪一併帶領引



見恭候

皇上簡補如此則以旗缺對品補用之員咸知儆戒黽勉而各旗亦可收臂指之用矣

奏入於雍正十二年十月二十一日奉

旨所奏是交該部八旗照所奏行

正藍旗次護軍統領辦事護軍叅領六格奏稱八旗世職官員內有從前兼任職官時因公降級調用革去職官仍留世職隨旗行走之員該旗大臣有量其

人材復行帶領引

見以職官補用者並不將其降革緣由寫入綠頭牌內其引見之員於奏對履歷時又復隱瞞含糊具奏俱未可定臣請交與八旗都統等嗣後凡降級及革退職官仍留世職官員內有實係人材堪用帶領引

見復以職官補用者務將降革緣由寫入綠頭牌內帶領引見其應否復用之處恭候

睿裁

奏入於雍正十二年十月二十五日奉

旨這所奏是交與八旗大臣等照所奏行

兵部議覆據正黃旗滿洲左司掌關防叅領馬啟奏  
稱八旗火器營之鳥鎗向係動用錢糧由武備院官  
鐵匠造給其年久損壞者無補造之例俱買民間鐵  
鋪私造之鳥鎗備用故開設鐵鋪者借此圖利私造  
鳥鎗售與買賣人轉賣給口外蒙古請嗣後將京都  
直隸各省私行造賣鳥鎗者永行禁止若八旗兵丁

所用之鳥鎗有損壞者該大臣等移送左右兩翼鐵匠局令其製造補給其直省滿洲綠旗兵丁於有官鐵匠處亦照依此例其無官鐵匠之處應如何設立請交與八旗大臣等定議現今京都鐵鋪私行造賣之鳥鎗俱交與五城勒限兩箇月追出送兩翼鐵匠局備用其直隸各省私賣之鳥鎗亦交該督撫提鎮等勒限兩箇月追取備用凡追取交官之私造鳥鎗俱著估價給還本人倘禁止後仍有私藏私造盜賣

者或被查出或被旁人首告將私藏私造之人從重  
治罪外將該管官員交部查議等語應如馬啟所奏  
嗣後京師八旗兵丁等有損壞之鳥鎗著該管大臣  
等轉送兩翼鐵匠局補造其直隸各省滿洲綠旗營  
兵丁鳥鎗損壞有官鐵匠之處亦照此例補造無官  
鐵匠之處交該省駐防將軍副都統及督撫提鎮等  
定議設立亦照此例補造其應添設鐵匠之工食於  
耗羨銀內支給如有用鐵之處於存貯廢鐵內酌量

給用其用過廢鐵及添設鐵匠工食數目造冊報部  
查核仍飭五城御史司坊官併督撫提鎮轉行各地  
方官於文到之日俱勒限兩箇月將民間鐵鋪內私  
造之烏鎗及民間違禁隱藏之烏鎗嚴行追出造冊  
報部京師交兩翼鐵匠局外省交本處鐵匠局又查  
定例內開私造烏鐵之民交地方官照例治罪將失  
察之地方官罰俸一年如有隱匿情弊降二級調用  
等語私藏烏鎗久已禁止而民間仍有私造隱藏顯

係違禁其應交之物不應給還價值如兩箇月內追  
出照例入官免其治罪如逾限不能追出並民間有  
隱藏不行交出者一經查出除鳥鎗入官外將私造  
隱藏之民人並失察之地方官照例分別治罪俟

命下之日行文順天府五城八旗都統並各省將軍督撫  
提鎮一體遵行

奏入於雍正十二年十一月三十日奉

旨依議

領侍衛內大臣會同內務府總管等議覆據國子監司業朱蘭奏稱伏思

景運門隆宗門以內係

宮院禁地所關甚鉅舊例惟許近

御侍衛及各執事人等行走餘人一槩不准出入近見各

部院八旗大臣官員俱擅行出入殊屬不合臣請嗣

後即應行走之侍衛與各執事人及內閣兵部理藩

院官員等亦必由各該處預開職名行文司門官員



記檔對名再准進內其餘俱照舊例不准出入俱令由

後左門行走等語查

景運門隆宗門實為要地嗣後除

內廷行走之王貝勒貝子宗室公等仍准其行走外其餘王貝勒貝子宗室公等俱令由

後左門出入親王以下宗室公以上仍照前准帶跟隨人其大臣等跟隨之人槩不准入其

乾清門侍衛奏事批本人員領侍衛內大臣散秩大臣  
值班侍衛茶飯房並預備弓箭持傘人及打牲執事  
人等侍衛筆帖式內務府大臣官員筆帖式鑾儀衛大  
臣官員再現今辦理軍機事務大臣官員等俱令由  
景運門隆宗門後左門行走外其部院八旗大臣官員  
俱令由

後左門行走俟

命下之日通行傳諭令各處將應行走人等職名開寫行

文

景運門值班大臣處登記檔案查對准行如司門人等不行詳查仍令混行出入將值班之大臣官員以及護軍人等一併交部從重治罪

奏入於雍正十二年十一月三十日奉

旨依議

八旗都統等議覆據署都統刑部尚書憲德奏稱嗣後原管佐領世管佐領缺出即於出缺人之子及親

弟兄親弟兄之子內揀選人去得能辦理佐領事務者擬定正陪補授此內如不得人於近族內揀選補授或仍不得人於闔族內揀選補授其應預備者仍照常預備等語查雍正元年九月內奉

旨嗣後凡承襲世職及補授佐領若有應行列名而不列名者於其家譜本名之下將情由註明欽此復蒙

皇上軫念初立佐領人員令伊等幼子管理特降

諭旨不論伊族之遠近揀選人去得者一人令其署理教

導成就此誠我

皇上造就人材之

殊恩但現今

臣

等八旗擬補此等原管佐領世管佐領之

缺均照此例於出缺人之子內揀選應補佐領之人  
擬正若無嗣於親弟兄內揀選擬正復揀選最近者  
一人擬陪仍於有分族人內每支派內揀選一人預  
備倘應行列名人員內如有事故不挑選者將情由  
即於家譜內名下註明今若照憲德條奏不論族派

概行揀選則將來日久不無爭競瞻徇等弊其憲德  
所奏之處無庸議查現今八旗補授佐領承襲世職  
僅將擬定正陪人員帶領引

見其預備人等俱係在外預備請嗣後凡擬正擬陪以及  
預備之人俱行帶領引

見

奏入於雍正十二年十二月初八日奉

旨依議

八旗都統等議覆據監察御史惠中奏稱八旗近公署之處開設鋪面貨賣煖酒者甚多凡該班傳事之不肖兵丁每乘間聚飲酗酒鬪毆甚屬不合且兵丁等所賴以謀生者惟此錢糧或於未關錢糧時即入鋪內賒飲既關錢糧之後遂還去大半甚至將一月所得之錢糧盡還酒鋪者有之實與兵丁生業無益等語臣等伏思從前因八旗兵丁等不善謀生恣意飲食妄行費用仰蒙

皇上屢降

諭旨教以節儉謀生之道今兵丁等各知自勵俱能節省  
無酗酒之徒但公署近處若有此等貨賣煖酒之人  
雖各旗派有查拏之員或有不肖之徒早晚偷飲亦  
未可定相應照惠中所奏令各該旗行文提督衙門  
交與步軍校等將公署近處所有貨賣煖酒鋪面不  
准開設仍令番役等不時查拏<sub>且</sub>等該旗仍飭訪拏  
光棍官兵不時嚴行查拿如禁止之後仍有不肖民人



私行偷賣者拏獲之日照例治罪外將該旗失察官員亦交部查議

奏入於雍正十二年十二月十四日奉

旨依議

署理都統事務多羅貝勒飛素奏稱

大內阿哥格格等合巹吉期例由禮部查選八旗原配夫妻內屬相相符之婦人但伊等佩服之頂帽朝服簪珥素珠等物各該旗並無預備者故每次派出之人

俱係自行借用此項乃必需之物若俟臨期借用似屬不便請交與內務府量其足用製造數套收貯備用若派出之人係何旗即令該旗出具印文領取用畢仍具印文繳回

奏入於雍正十二年十二月二十日奉

旨依議

吏部等衙門議覆據鑲紅旗漢軍左司掌關防叅領王士儀奏稱外任子弟歸旗後除學文者照例送入

官學讀書學武者令披甲當差外其有告假出京該旗不得自行給假必查明情由移咨該部如果與例相符一面給與執照一面移咨該省督撫轉飭該地方官依限催令歸旗等語應如該叅領所奏嗣後外任旗員子弟歸旗後該旗即查明應送入官學讀書者送入官學應披甲當差効力者著令披甲當差効力仍令該旗不時稽查管束倘有不務本業在外遊蕩者將該旗該管佐領照例議處至有因事告假等

情應令該旗查明確實情由與例相符者本旗酌量給假分別省分定限給以執照令其依限歸旗並咨部行文該省督撫轉飭地方官按限催令歸旗又據奏稱如有借端逗遛不肯歸旗經地方官呈明督撫押送來京即送刑部治罪其有違限者亦必計其違限月日照例治罪等語查雍正七年八月初十日奉

旨嗣後歸旗人員有逾限逗遛在外應行枷號者著按其逗遛年月之多寡以為枷號之期若逗遛一年即枷

號一年照此計算倘另有生事犯法之處則從重歸結  
永著為例欽此欽遵在案外任旗員子弟如有借端逗  
遛逾限不肯歸旗者應仍照定例遵行無庸再議

奏入於雍正十二年十二月二十一日奏

旨依議

世宗憲皇帝諭行旗務奏議卷十二

欽定四庫全書

世宗憲皇帝諭行旗務奏議卷十三

乾清門一等侍衛武勒德奏稱前經奉

旨奉天寧古塔黑龍江等處新滿洲索倫打虎兒等有欲  
來京歸族居住者著乾清門侍衛等具奏欽此欽遵在  
案數年以來居住人等蒙

皇上加恩賞給搬家銀兩今不肖人等欲來京歸族居住  
者甚多奴才等詢問伊等內有並未呈明該處大人

只回明佐領等官而來者伊等身係披甲而不在該管大人處告假來京揆此或在該地方妄行非法不能度日希圖微俸來京居住亦未可定奴才等在京居住二三十年伊等真假無憑查考仰請嗣後若有來京歸族居住者令其呈明該將軍詳細查明聲明緣由用印文咨送來京該旗大人查明將應令居住者奏

聞令其居住如此則不肖人等妄希微俸之弊可除矣



奏入於雍正十三年正月二十三日奉

旨這所奏甚是交領侍衛內大臣照所奏行

兵部議覆據監察御史巴什泰奏稱官職補服俱有定制不便混行穿用今部院郎中等官係五品職銜如兼叅領則俱用三品孔雀補服如兼佐領則用四品雲雁補服再由文職而兼武職由武職而兼文職者若文職較小而武職較大緊照武職品級而改用文職補服者頗多仰請嗣後文武兼銜之員如文

職銜大則用文職補服武職銜大則用武職補服如  
文武職銜相當仍用文職補服至陞轉之官員俱著  
照依現任品級遵行等語應如巴什泰所奏嗣後凡  
文武兼銜者若文職較大則用文職補服武職較大  
則用武職補服倘文武職銜相當則用文職補服至  
陞轉之文武官員俱各用現任品級補服再由武職  
兼文職者武職品級較大仍令穿用武職補服不得  
濫用品級相當之文職補服其由文職兼武職者均

照此例遵行仍交都察院步軍統領查旗御史等不時嚴查倘有不照現任品級混行穿用者即行查叅交部治罪又據奏稱武職都司僉書係正四品守備係正五品今京營守備不論大小職銜槩用四品頂帶京營既皆如此則外省有似此者亦未可定伏乞勅令兵部行文步軍統領及各省督撫提鎮各嚴飭所屬官弁若係加都司僉書銜者准作四品外其署守備事管守備等官俱著用五品頂帶補服至於應關俸

薪銀兩亦照此例支給等語亦應照巴什泰所奏行文步軍統領及各省督撫提鎮各嚴飭所屬官弁嗣後係加都司僉書銜者准用四品頂帶外其署守備事管守備者俱著照依定例用五品頂帶如仍有混行穿用者俱照違背禁令律罰俸一年其各上司俱照不行詳查例罰俸六箇月再武職官員既定有照依品級關給俸薪銀兩之例遵行已久應毋庸議

奏入於雍正十三年二月十一日奉

旨依議

兵部議覆據總理阿爾泰軍臺馬羣總管五十四等  
奏稱看得各處來文其封套鮮有雙層厚紙多係單  
層薄紙是以字畫顯露驛站遞送易致磨壞倘有事  
故關係匪輕等語除臣部照依所奏遵行外行文知  
會各衙門八旗嗣後凡遞送軍營一應公文俱用雙  
層厚紙封套釘封遞送倘有仍用單紙透字封套不  
加釘封者承收之處即將封套駁回該部將承辦官

員照例議處書吏等照例責革又據奏稱兵丁自家  
中寄送衣服物件應照從前奏准之例一次不過六  
百觔或作木箱盛貯遞送或用皮包裹遞送如此不  
但道路無磨壞遺失之患且於兵丁大有裨益等語  
亦應照所請嗣後有寄送軍營包袱可行文工部製  
造木箱長三尺六寸寬一尺七寸高二尺三寸於接  
榫處四面用鐵葉釘裹將包袱裝入仍照原奏一次  
不過六百觔令其遞送如此庶寄送軍營之包袱無

磨壞遺失之患而押送官兵亦免賠補疎忽之咎實  
於兵丁大有裨益

奏入於雍正十三年四月初一日奉

旨依議

順天府府丞周紹龍奏稱伏查直省州縣歲科考取  
童生例由各學廩生出具保結方准錄送學臣該廩  
生當堂識認以杜頂冒等弊遵行已久惟八旗童生  
例由各旗都統考送臣接禮部劄付方准府考錄送

學臣每逢歲科兩試各旗只派章京一員識認每旗童生不下百十餘名其中旗分與渾托和包衣佐領所轄不一章京一員臨時倉卒安能一一詳審且因循已久八旗內章京亦有不到者臣甫經到任留心體察府試該童是否名冊的身臣實無憑稽查就中讀書向上者固不乏人而希圖倖進頂替之弊恐亦難保必無以臣愚見各該童生報名旗考照漢學例取具本旗廩生認結都統將名冊一齊送部臣及學



臣考試時令滿學教官二員帶領各廩生當堂識認倘有頂替將廩生一體治罪現今旗考已過臣府試與學臣錄科俱已屆期伏祈

皇上諭令八旗都統補取各該廩生認結限十日齊備送至禮部臣接准禮部劄付考試廩生當堂識認似屬妥協是旗考時歷經各旗叅佐領保送臣與學臣考試又有各旗廩生認結則弊實可以肅清於八旗人才實有裨益矣

奏入於雍正十三年六月十二日奉

旨這所奏是著照所奏行

八旗都統等議覆據都統侯朱震奏稱遇有委署步軍校缺出如本旗無拖沙喇哈番以下世職或世職內無勝任之人即於驍騎校內揀選委署或驍騎校員缺另行委署辦理如果行走勤慎遇步軍校缺出奏請實授等語查委署步軍校一缺有稽查看守之責必得能管轄之人始於事有裨益應如朱震所奏

如本旗有可委署之世職仍遵舊例辦理外如本旗內並無世職及世職內不得勝任之人即於護軍校驍騎校內揀選賢能之員帶領引

見委署伊等所遺員缺照例另行揀選委署如此則委署步軍校得人而管理佐領下事務亦可不致遲悞此委署步軍校如果勤慎黽勉遇有步軍校缺出該步軍統領保送即行帶領引

見實授

奏入於雍正十三年七月二十五日奉

旨依議

八旗都統等議覆據翰林院侍講學士伊爾敦奏稱  
每年出牧以後各佐領下留肥馬二匹原以備官差  
之用若與跟大人之領催等混行乘騎一月之內按  
班奏事三次另有應奏事件則至每月數次雖肥馬  
亦必至於疲瘦遇有出差則領馬者因贖欠不收拴  
馬之人無奈懇求貼給銀一二兩令其領去又兼騎

至遠途俾受辛苦若至倒斃則又費錢糧買補查領  
催等跟隨大人乃偶然之事即令其騎用官馬似屬  
不合嗣後若遇此等之事不許混乘官馬等語查留  
旗之官馬乃衆馬之內挑其臚肥者以備官差之用  
關係緊要即使果有官差必待兵部印丈方行辦給  
不可擅用且各旗俱有跟大人查堆以及傳事人等  
之馬乃鑲紅旗違例動用留旗肥馬傳給跟班之領  
催等混行乘騎殊屬不合將此交與該旗大人查明

叅奏外嗣後照伊爾敦所奏將跟班之人永不許擅  
騎額設之馬

奏入於雍正十三年七月二十五日奉

旨依議



世宗憲皇帝諭行旗務奏議卷十三